

## 魏伯陽祖傳 ---- 陳子石宗師

東漢魏伯陽祖者。吳人也。本高門之子。而性好道術。後與弟子三人入山作神丹。丹成知弟子心懷不盡。乃試之曰。丹雖成。然先與犬試之。若犬飛昇。然後人可服矣。若犬死。即不可服。遂乃將丹與犬食之。犬食之即死。魏祖謂諸弟子曰。作丹唯恐不成。今既成。而犬食之死。恐是未合神明之意。服之恐復如犬。為之奈何。弟子曰。先生當服之否。魏祖曰。吾背違世路。委家入山。不得道亦恥。復還死之與生。吾當服之。乃服丹入口即死。弟子顧視相謂曰。作丹以求長生。服之即死。當奈此何。獨一弟子曰。吾師非常人也。服此而死。得無意也。因乃取丹服之亦死。餘二弟子相謂曰。所以得丹者。欲求長生矣。今服之既死。焉用此為。不服此藥。自可變得數十歲在世間也。遂不服。乃共出山。欲為魏祖及死弟子求棺木。二子去後。魏祖即起。將所服丹內死弟子及白犬口中皆起。弟子姓虞遂皆仙去。道逢入山伐木人。乃作手書與鄉里人寄謝。二弟子乃始懊恨。魏祖作參同契五行相類。凡三卷。其說是周易。其實假借爻象以論作丹之意。而世之儒者不知神丹之事。作陰陽註之。殊失其旨。

## 紀念魏伯陽祖師駢言

蓋魏祖丹訣。參同所參。呂祖真機。指玄所指。精神能補矣。生命可培焉。造化之生。陰陽之契。雙脩真義。承周易之玄宗。三五傳心。闢悟真之道脈。斯集獨授知音之侶。難傳畏死之徒。甘泄天符。挽回未刳。拿東龍而契西虎。攝陰炁而合陽精。以擒以制。固其法也。辛丑之歲。余因主編於精神脩養刊第十四輯。值獻頌元春。雅懷我祖。脩仙之範。多露於經中。揭道之源。直求於同類。立予天命。陰陽稟受。雌雄相須。既取鴻濛。還分彼此。精尚憑於逆脩之積。炁猶得於感化之通。妙美遺傳。玄風復振。派衍陰長生祖。闡軒轅之學。讀老祖之經。每秘淺言。有真簡說。嘗閱鼎器歌一則。悟其圓通要妙。大事闡微。兩寸言唇。四八喻口。窈窈乎。冥冥乎。可謂能心契其玄者矣。然而真經不少。口授幾稀。所學靡逢。空脩徒嘆。願續長生之法。頻貽脩養之刊。辨周天於小往大來。拾靈電於龍吟虎嘯。旁門強說。至道難宣。邪反泥文。正猶忘象。明循環而栽接。以消息而相連。道學中人。玄而非妄也。余既耽共道。復參其經。方悟人元。乃知育種。喜鑪峰院闢。玄旨著成。解脫未償。行持有數。紫霞在望。白雪頻飛。每感道窮。輒呼法護。果爾三五德就。乾體乃成。四海布施。一心祝禱。人人通易。個個參玄。愛學此悟之。憶當年著易。訣載亢潛。法詳飛躍。陽以三立。陰以八通。猶當識三日震動。八日兌行。其亦有返還之奧乎。幸無枯坐獨脩妄為也。

乾坤者易之門戶。衆卦之父母。牝牡四卦。以爲橐籥。天地設位。而易行乎其中矣。往來既不定。上下亦無常。窮神以知化。陽往則陰來。震來受符。天地媾其精。雄陽播玄施。雌英化黃包。三日出爲爽。震受庚西方。八日兌受丁。上弦平如繩。十五乾體就。盛滿甲東方。內照形軀。閉塞其兌。近而易求。上德無爲。下德爲之。上閉則稱有。下閉則稱無。無者以奉上。上有神德居。此兩孔穴法。金炁亦相胥。知白守黑。神明自來。子藏母胞。方圓徑寸。混而相居。旁有垣闕。狀似蓬壺。環匝關閉。守之者昌。失之者留。跨火不焦。入水不濡。偃月法鑪鼎。白虎爲熬樞。上弦兌數八。下弦艮亦八。兩弦合其精。乾坤體乃成。金入于猛火。色不奪精光。金本從月生。朔旦受日符。金返歸其母。月晦日相包。呼吸相含育。仔細爲夫婦。黃土金之父。流珠水之子。水盛火消滅。俱死歸厚土。術士伏食之。壽命得長久。薰蒸達四肢。顏色悅澤好。髮白皆變黑。齒落生舊所。老翁復丁壯。耆嫗成姘女。改形免世厄。號之曰真人。欲作伏食仙。宜以同類者。燕雀不生鳳。狐兔不乳馬。水流不炎上。火動不潤下。世間多學士。高妙負良材。邂逅不遭遇。耗火亡資財。離性不同類。安肯合體居。千舉必萬敗。欲點反成痴。稚年至白首。中道生狐疑。背道守迷路。出正入邪蹊。管窺不廣見。難以揆方來。素無前識資。因師覺悟之。火記六百篇。所趣等不殊。文學都重說。世人不熟思。竊爲賢者談。曷敢輕爲書。若遂結舌痞。絕道獲罪誅。寫情著竹帛。又恐泄天符。金計有十五。水數亦如之。臨鑪定銖兩。五分水有餘。二者以爲真。金重如本初。其三遂不入。火二與之俱。三物不含受。變化狀若神。始文使可脩。終竟武乃陳。赫然成還丹。刀圭最爲神。陰陽相飲食。交感道自然。金來歸性初。乃是稱還丹。賢者能行持。不肖毋與俱。乾剛坤柔。配合相包。陽稟陰受。雌雄相胥。混沌鴻濛。牝牡相從。陽炁造端。初九潛龍。陽以三九。陰以八通。三日震動。八日兌行。九二見龍。和平有明。三五德就。乾體乃成。推情合性。轉而相與。仰以成泰。剛柔並隆。陰陽交接。小往大來。化炁既竭。亡失至神。道窮則反。歸乎坤元。陽神日魂。陰神月魄。魂之與魄。互爲室宅。乾動而直。炁布精流。坤靜而翕。爲道舍廬。類如鷄子。黑白相符。骨弱可卷。肉滑若鉛。二炁玄且遠。感化尚相通。何況近存身。切在於心胸。真人潛深淵。浮游守規中。淫淫若春澤。液液象解冰。耕耘宿污穢。細微得調暢。濁者清之路。昏久則昭明。世人好小術。不審道淺深。欲知伏食法。事約而不繁。可以口訣。難以書傳。卯酉界隔。主客二名。龍呼於虎。虎吸龍精。兩相飲食。俱相貪并。遂相啣嚙。咀嚼相吞。物無陰陽。違天背元。牝鷄自卵。其雛不全。男女相胥。含吐以滋。雌雄錯雜。以類相求。龍陽數奇。虎陰數偶。含元虛危。播精於子。雄不獨處。雌不孤居。假使二女共室。顏色甚殊。推心調諧。合爲夫妻。伏煉

九鼎。化跡隱淪。故爲亂辭。孔竅其門。同類易施工兮。非種難爲巧。圓三五。寸一分。口四八。兩寸唇。長尺二。厚薄均。陰在上。陽下奔。首文武。中間文。吉人相乘負。安穩可長生。

